

Muqobil energetikani rivojlantirish va aholi bandligini ta'minlash choralari belgilandi



Prezident Shavkat Mirziyoyev 2021-yil 17-iyun kuni Andijon tumanidagi adirlikda Yangi Andijon shaharchasi qurilishiga poydevor qo'yan edi. Bugungi kunda ko'p qavatli uylar, maktab va bog'chalar qad ko'tarmoqda.

1 fevral kuni bu yerda qayta tiklanuvchi energiya manbalarini ommalashtirish va aholi bandligini ta'minlash choralari bo'yicha yig'ilish o'tkazildi.

Mamlakat iqtisodiyoti va aholi o'sishi bilan elektr iste'moli ham kundan-kunga oshmoqda. So'nggi besh yilda yurtimizda xonardonlar 1 million 200 mingtaga ko'paydi, korxonalar soni esa 260 mingtaga yetgan. Bular elektr energiyasiga bo'lgan talabni 35 foizga oshirdi. Xususan, Andijon, Farg'ona va Namangan viloyatlarida elektrga talab 40 foizga ko'paygan.

- Bunday sharoitda eng to'g'ri yechim qayta tiklanuvchi energiya manbalarini ko'paytirish, - dedi Shavkat Mirziyoyev.

Shu bois yig'ilishda quyosh va shamol stansiyalari loyihibalariga e'tibor qaratildi.

Bu yil Pop va Farg'ona tumanlarida 600 Megavattli 2 ta quyosh stansiyasi qurilishi rejalashtirilgan. Andijonda 41 ta, Namanganda 32 ta va Farg'onada 27 ta mikro gidroelektr stansiya qurish imkoniyati bor.

Davlatimiz rahbari yirik korxonalarda ham qayta tiklanuvchi energiya manbalaridan foydalanish, umuman, ularni elektr bilan o'zini o'zi ta'minlashga o'tkazish kerakligini ta'kidladi.

Ijtimoiy obyektlarda quyosh energiyasidan foydalanish uchun alohida kompaniya tashkil etiladi. Unga 200 million dollar mablag' beriladi. Kompaniya quyosh panellari va suv isitish qurilmalarini o'zi o'rnatadi hamda budjet korxonasiga "yashil energiya" sotadi. Shuningdek, ijtimoiy obyektlardagi 3 mingta eskirgan qozonlarni zamonaviy uskunaga almashtirish zarurligi qayd etildi.

Energiya resurslarini iqtisod qilish choralari ko'rsatib o'tildi. Aholining quyosh energiyasidan foydalanishi uchun jozibador tizim yaratish vazifasi qo'yildi.

Yig'ilish kun tartibidagi ikkinchi masala kambag'allikni qisqartirish va aholi bandligini ta'minlash haqida bo'ldi.

Ma'lumki, bu borada viloyatlarga zarur sharoitlar yaratilmoqda. Xususan, 31 yanvar kuni imzolangan Prezident qaroriga ko'ra, oilaviy tadbirkorlik uchun imtiyozli kreditlarga Andijon viloyatiga 1,1 trillion so'm ajratiladi.

So'nggi ikki yilda aholiga dehqonchilik uchun 8 ming hektar hosildor ekin yerlari berilgan, 2023-yilda yana 10 ming hektar yer tarqatiladi. Mahallalarda sanoatni rivojlantirish uchun 36 ta mikromarkaz tashkil etiladi.

Davlatimiz rahbari ishbilarmon va mehnatsevar odamlar yurti bo'lgan Andijonni ishsizlikdan xoli hududga aylantirish mumkinligini ta'kidladi.

Darhaqiqat, bu yil viloyatda 800 million dollarlik 235 ta investitsiya loyihasi yakunlanib, 40 ming kishi ish bilan ta'minlanadi. Aholiga ajratiladigan 10 ming hektarda 75 mingta doimiy va 200 mingta mavsumiy ish joyi ochiladi.

Ihsiz odamlarni kasb-hunarga o'qitish, mahallalarda ijtimoiy va tadbirkorlik infratuzilmasini yaxshilash bo'yicha ham vazifalar belgilandi.

Tuman va shahar hokimlari aholi bandligini oshirish rejali yuzasidan axborot berdi.





Uzbekiston Respublikasi Prezidentining
MATBUOT XIZMATI

Manba